

忻州直隸州志

定生題



忻州志卷九

知忻州直隸州事方戊昌編輯

城池

州城始築於後漢末西跨九原後魏肅宗熙平二年九月  
又城肆州所治九原唐宋因而新之周九里二十步城  
高二丈五尺池深一丈七尺明洪武三年知州鍾友諒  
重修嘉靖十六年知州李用中加修二十八年周夢綵  
濬隍治垣增設敵臺復以積雨城圯十之六七倡議捐  
修躬親督視衆力不作旬日而大壞者完浹辰而半頽  
者葺增卑繕陋逾月訖工萬曆二十四年巡撫魏公允

忻州志 卷九 城池

一

貞捐課金以贄磚石檄委太原府同知賈一敬知州張  
堯行董其事經始於四月訖工於二十六年十月磚厚  
七重石基八尺高四丈二尺周二千一百九十丈有奇  
隍三重深二丈闊丈餘四門東迎暉更名永豐南康阜  
更名景賢西留映更名新興北鎮遠更名拱辰宗伯余  
繼登記東北角隍三重蹟存餘止一重南北門外皆有  
關廂築郭

國朝因之乾隆九年十一月巡撫阿公遵

旨查辦城工檄飭確核估計經前知州謝廷琪查明城垣  
成樓損壞除舊存物料外將應行添補物

料工價共估銀六千六百四兩二錢五厘具報在案十一年四月初四日巡撫阿公奏請將晉省應修城垣先後估需工料銀兩數目並酌議配定分年修復處所彙開清單進呈單開自己巳年興工始忻州城垣派在第五次應於乾隆癸酉年興修動撥節年積剩耗羨添湊敷用等因有案嗣於道光三十年前知州華典將坍塌過甚處略補葺旋即停止自我

朝乾隆十八年修後已百有餘年上溯前明萬曆二十四年迄同治年間近三百年爲時既久傾頽日甚前知州戈濟榮首先倡捐邀集紳商節次勸諭俾經費無絀經始於同治七年四月迄同治九年十月所有工程一律竣事通詳有案現在規模崇煥高城深池不僅壯觀瞻資捍衛已也

忻州志

卷九

城池

二

楊維嶽曰地險山川邱陵也王公設險以守其國郡脈自西來北少擁護議者欲將負郭地栽榆柳挑品窖以時濬之良善但此地東宜稼南北宜圃小民止計近利栽木而奪稼圃其誰與我况肯捐以挑窖乎往年聞警暫挑既堪禦虜又免濬治且不失栽種宜從民便惟是北壕土鹵易頽外無居民宵行取捷者多闌入藩衛未固頻繕爲難竊謂愚民狎於防虜眩於修福倘從七賢

祠西北築護城堤迤遶東北高三四丈厚倍之植木堤  
上下開圜門通行河南築墩與堤相應各建浮圖關截  
水口遇警即塞圜門不特守固且民殷阜家詩書矣利  
關郡城應多從者一勞永逸得無意乎

周人龍曰時平則籬棘足以防閑德散則深峻適資寇  
盜雖莒因無備楚克三都而秦設金城漢窺軹道彼有  
明之所以策三晉甯在此區區一忻而爲此區區一忻  
計者又甯在栽榆品窖乎楊公明於地脈每言津津又  
以未可以堪輿之說禦兵戎也然自隆萬以後迂儒鋒  
銳莫當卒以遊談誤國是若楊公者尙可云留心經濟

忻州志

卷九 城池

三

者矣今四海昇平八荒賓服民安盜熄俗美風清雖夜  
戶可以不閉而豈徒恃此城郭溝池之固乎以視夫末  
季之苟且倉皇拘迂鮮當實不知其相懸幾萬萬矣  
竇容遠曰高城深池上以壯國威下以資捍衛所關非  
細祇以承平日久官斯土者怠於從事往往執在德不  
在險之說以自脫卸殊不知雉堞頽廢則政令無足觀  
坑塹修整則百務自畢舉此必然之勢也方今

聖天子睿慮周詳勅令天下繕修城垣濬治隍池酌其緩  
急而次第築鑿業經

撫憲查核奏明在案行見郡邑環列星羅碁布以仁義

爲干櫓以心腹作障蔽斯無往非金湯之固矣

按州城失修幾三百年中間雖兩次修葺皆未能一律整齊以是日就傾頽幾無以限出入前知州戈濟榮在任最久經營相度每以需用浩繁興作非易遂首先倡捐復集紳商節次敦勸俾經費有盈無絀鳩工庀材始於同治七年四月迄於同治九年十月前後將及三年修繕完竣於是雉堞斯翬樓櫓崇煥又以餘資平治道路以利行旅可謂有心民事者矣工既畢因係民捐民修詳請獎勵廣文武學額格於部議未准

戈有碑記載入藝文共用

銀六萬有奇

昔孔子稱子路治蒲三善先舉溝洫深治墉屋

忻州志

卷九

城池

四

完固喜其民之盡力不偷余於忻之修城亦喜其急公好義力役之舉踴躍趨事然亦由二百餘年涵濡教澤故民經之營之絕無計功之心而終始無倦也

